



Magnum Bullarium Romanum, Seu Ejusdem Continuatio

Quæ Supplementi loco sit, tum huicce, tum aliis quæ præcesserunt
Editionibus, Romanæ, & Lugdunensi ...

Complectens Constitutiones Benedicti XIV. ab initio Pontificatus usque ad
Annum 1746

Luxemburgi, 1752

LXXX. Electio Patriarchæ Maronitarum a Pontifice facta, & ablegatio
Commissarii Apostolici Archiepiscopis, & Episcopis ejusdem Nationis
denunciatur. 16. Martii.

[urn:nbn:de:hbz:466:1-74696](https://nbn-resolving.org/urn:nbn:de:hbz:466:1-74696)

animo considerans, & quam ardua sit provincia Tibi commissa, & quam amplae facultates ad illam alacrius adeundam, & felicius explicandam, componendamque attributa, omnia studia, omnes conatus, & vires intendas, non ut Apostolicam tantum benignitatem nostram Tibi promerearis, sed ut aeternam etiam in caelis repositam mercedem a bonorum omnium remuneratore Deo, quem unum pra oculis habere debes, consequi possis, & valeas. Nos interim, ad prosperi successus auspiciam, Tibi Apostolicam Benedictionem, quam Nostro nomine universae Nationi mandatis tuis obtemperanti, tuaque salubria monita adimplenti, elargiri poteris, peramanter impertimur.

Dat. die 16. Mart. 1743.

Datum Romae apud Sanctam Mariam Majorem sub Annulo Piscatoris die XVI. Martii MDCCXLIII. Pontificatus Nostri Anno Tertio.

D. Card. Passioneus.

LXXX.

Electio Patriarchae Maronitarum a Pontifice facta, & Ablegatio Commissarii Apostolici, Archiepiscopis, & Episcopis ejusdem Nationis denunciatur.

Venerabilibus Fratribus, Simoni ab Archiepiscopatu Damasci ad Patriarchalem Maronitarum Sedem translato, ceterisque Archiepiscopis, & Episcopis ejusdem Nationis.

BENEDICTUS PAPA XIV.

Venerabiles Fratres, salutem, & Apostolicam Benedictionem.

Pontifex refert, ac deplorat schisma inter Maronitas exortum.

MAGNA non minus admiratione, quam aegritudine affecti sumus, postquam e sex Episcoporum vestri Caeus, aliorumque literis intelleximus, Maronitarum Ecclesiam, post obitum postremi Patriarchae Josephi Petri, funesto Schismate discissam fuisse; a sex illis Episcopis in ejus locum suffecto Elia Arca, ab aliis Tobiasa Napolosae Archiepiscopis. Et quidem mirari satis non possumus, adeo nunc valuisse inimicum Hominem, ut superfeminaverit divisionis zizania in agro isto, adhuc ea lue prorsus intacto; utque vobis eripuerit decus amplissimum: id scilicet nunquam ex omni temporis memoria evenisse in vestro Patriarcha eligendo; qua laude nobiliores Ecclesiae, vestro in conspectu positae, plurimum caruerunt. Angi autem qui nequeat in tanta malorum colluvie, qua vestram Nationem, discordiis, tumultu, perturbatione obruerunt? Siquidem uterque Electus, non expectato Romanae Sedis judicio, (quod lege, & more vetusto necesse fuerat,) statim pro Patriarcha se gerens, forum aperuit, usurpanque Patriarchalia jura, miscet humana Divinis, ut suo se teneat loco. Hinc populus alterutri inharens, incertus, divisus, triste sui spectaculum praebet insultanti Schismatico, Turcae irridenti; & metus est, ne vera Dei Religio, quamquam vestrae Genti altis radicibus infixae, obcaecatis contentione mentibus, discrimen adeat, ut saepius alibi.

Ejusque perniciosos effectus.

Controversiae examen in Congregatione particulari instituitur.

§. 1. Hac enimvero sollicitudine, ac paterna caritate commoti adeo sumus, ut vestris mendendis vulneribus, restituendaque sanitati acceleravimus, vix dum Romam venerunt utriusque partis Legati cum mandatis, & monumentis, supremum Apostolicae Sedis judicium subituri. Nam statim selegimus aliquot e Sanctae Romanae Ecclesiae Cardinalibus, Propagandae Fidei praepositis, qui juris ordine servato, auditisque Advocatis, de toto controversiae statu cognoscerent, & coram Nobis deciderent, an alterutra Electio, seu Postulatio, confirmanda foret, aut sananda; & si utraque infirmenda, quid ultra Nobis agendum esset. Illi apud Nos conveniunt XV. Kalendas Martias, unaque fuit omnium sententia: utramque non modo nullam, atque invalidam, sed insanabilem videri, tantis undique scateat erratis adversus Canones, ipsaque vestras Constitutiones. Jus proinde eligendi, in hoc informis electionis casu, ad Apostolicam Sedem devolutum fuisse; sicuti Ecclesiasticae jubent Leges, & ubique perpetuo in more fuit: cujus si nullum istic exemplum reperitur, referri debet Majorum vestrorum prudentiae, qui ab hujusmodi nefario Schismate sibi semper caverunt.

§. 2. Nos igitur eorumdem Cardinalium sententiam assensu nostro prosequuti, utramque electionem penitus abrogavimus. Simul autem Patriarcham vestrum elegimus Venerabilem Fratrem Simonem Archiepiscopum Damasci, qui antiquior vestri Caeus, hoc etiam nomine commendationem habuit ad eam dignitatem; magis autem, quod miti ingenio, & a partium studiis abhorrente, ut plurimum testimonio accepimus, idoneus Nobis visus est ad tantum munus gerendum. Quocirca acceptissimum vobis, vestraeque Genti fore, idque prompto atque alacri erga ipsum obsequio, debitaque obedientia vos comprobaturus non dubitamus, daturusque documentum, praeteritas discordias non praecipiti voluntatis actu commotas fuisse, sed incaute mentis errore, qui facilius excusari potest.

Congregationis senus.

Abrogata duplici electione, alter eligitur Patriarcha, mentorum laude praestans.

§. 3. Nec vobis in mentem veniat suspicari, hac nostra extraordinaria consueti Patriarchae providentia, juri vestro quidpiam detractum fuisse. Nam, & ipsum in hujus electionis diplomate vobis expresse reservavimus, & in Provincialis, seu Nationalis recentis vestrae Synodi confirmatione, novo, ut perebatis, Pontificiae auctoritatis robore permunivimus.

Salvis juri- bus Antistitum Maronitarum.

§. 4. Haec per nostras istas literas in forma Brevis vobis referre fati duximus. Plura cognoscetis a Dilecto Filio Jacobo ab Urbe Luca, Observantium Franciscanorum Alumno, Apostolico Hierosolymis Visitatore, quem ad vos Nostro nomine ire Commissarium jussimus, ut sedulo curet observari, & custodiri quicquid in praenunciata Synodo, & a Nobis deinde, pro Ecclesiastica disciplina, sanctissimaeque Religionis tutela, sancitum fuit; utque receptis a Saecerdote Andrea Felice, quem Patriarcha Joseph Petrus paulo post vita functus Romam ablegaverat, Nostri in forma Brevis ad eum literis, ubi plura peragenda commendavimus, & recuperato aliquo Religioso dono ad eundem Patriarcham transmissis, id omne Simoni ejus successoris representet, nostramque de rerum istic sacrarum Cultu, rite, ac prudenter instituendo retinendoque, voluntatem, cujus conscium fecimus, patefaciat.

Commissarius Apostolicus pluribus facultatibus, & mandatis instructus ablegatur.

§. 5. Quin illum perhumaniter excepturi, praescriptaeque vobis leges, accurata obedientia exequutari sitis, nullum Nobis relinquit ambigendi locum, omnium vestrum animus religione, & constantissima erga Supremum Pastorem fide penitus obstrictus. Praecipue vero vos adhortabitur, ut obliti praeteritae emulationis, unanimes sitis in Christo Jesu, sine querela, sine reprehensione, simplices filii Dei in medio Nationis, Turcarum scilicet, praese, & perverae, (Apostoli verbis utimur), inter quos lucetis sicut luminaria in mundo. Quod in auspiciis, Venerabiles Fratres, Apostolicam Benedictionem vobis peramanter impertimur.

Debita Sanctae Sedi obedientia, & animorum concordia commendat.

Datum Romae apud Sanctam Mariam Majorem sub Annulo Piscatoris die XVI. Martii MDCCXLIII. Pontificatus Nostri Anno Tertio.

Dat. die 16. Mart. 1743.

J. Vincentius Lucchesinus.

Dignitas